

Sumáriu Dixiplina Tetun

Tinan da-7, períodu II

UNIDADE 4: Dada-lia kamponés Timór nian

A. Aprende si'ik ai-sasi'ik no espresaun sira!

- a. Kulit taka ruin, ruin taka isin no isin taka been (Ne'e katak: nuu-fuan).
- b. Halo la uza, uza lahatene (Ne'e katak kaixaun: ema ne'ebé halo la uza, ida-ne'ebé uza lahatene).
- c. Sai kuak tama kuak ikun tuir hela (Ne'e katak: bainhira ema suku rounpa ruma, daun tuu tama no sai kabas tuir hela iha kotuk husi kuak ida ba seluk).
- d. Leten kabeer kraik sabraut (Ne'e katak: ai-saar: rohan ba leten kaer fatin kesi hamutuk kabeer no rohan kraik hodi dasa namurai hela).
- e. Leten fulun, kraik fulun, fulun kona malu mundu lakon (Ne'e katak: iha tempu ita toba matan-fulun leten no kraik kona malu katak dukur ona iha-ne'e ita lahatene ona mundu).
- f. Sira mesak *ulun mamar* (Ne'e katak: matenek).
- g. Labarik sira-ne'ebá mesak *liman naruk* (Ne'e katak: na'ok-teen).
- h. Ami sira-ne'e mesak *liman kmaan* (Ne'e katak: badinas).
- i. Nia *ulun-toos* tebes entre ita hotu (Ne'e katak: ko'alia ba nia nia lakohi rona ideia seluk).
- j. Alin-oan ne'e *karau-atan* (Ne'e katak: mahein)

Ezersísiu 4.1. Liga ai-sasi'ik ida-idak ho ninia sentidu!

Ai-sasi'ik sira	Nu.	Sentidu
Ha'u haree ha'u, ha'u fihir ha'u		1. telefone (rona lian hosi telefone mai la haree ema ne'ebé ko'alia)
Fokit kuak ai-riin hela		2. Ita ema haree no fihir an iha lalenok nia oin
Ha'u bá ó mai, ha'u mai ó bá		3. Bolu asu nia naran hatán ho baku nia ikun
Bolu naran hatán husi kotuk		4. Hasai kadeli husi liman-fuan no liman hela metin.
Bolu ha'u hatán isin-lolon ha'u la haree		5. Siklu loron ho fulan: ida mosu ida fali lakon

Ezersísiu 4.2. Liga espresaun ida-idak ho ninia sentidu!

Espresaun sira	Nu.	Sentidu
Tuda fatuk subar liman		1. inus
Labarik ne'e nia kakutak mamar		2. lori lia bá-mai
Foho ida iha mota rua nia leten		3. matenek ka obediente
Foho ida iha bee-matan rua nia leet		4. ko'alia maibé nega realidade
Ana nu'udar manu-talin di'ak ida ba João no Maria		5. inus-kain

B. Aprende lee

Ho apoiu hosi inan-aman, hili testu ruma kona-ba kultura Timór nian. Koko buka iha internet ka revista se la hetan iha fatin seluk. Lee testu ho klaru, ho lalais natoon, pronunsia ho loloos, ho espresaun, fó atensaun ba pontuasaun sira no komprende istória nia konteúdu.

C. Aprende hakerek

Sistemátiku hakerek kompozisaun

Hakerek testu uza liafuan hahusuk (interrogativu) iha dalen Tetun hanaran ho aprosimasaun sistemátiku. Ida-ne'e atu fasilita estudante espresa sira-nia opiniaun/hanoin iha parágrafu ida-idak ho sistemátiku, efikás no efisiente, no mós hakerek testu ruma ultrapasa husi parágrafu neen. Tanba liafuan hahusuk ida sei aborda nu'udar parágrafu ida. Tuirmai, liafuan hahusuk sira iha dalen Tetun:

1. Saida?

Hakerek-na'in sira uza liafuan hahusuk “**saida**” atu hahú fó definisaun ba liafuan ka tema sentráal ida. Ezemplu ba tema sentráal ida mak “**Eskola**”. Ezemplu parágrafu da-1:

“Eskola nu'udar instituisaun edukasionál ida harii hosi governu ka organizasaun naun-govermentál hanesan igreja no sociedade sivil. Eskola fornese espasu no ambiente aprendizajen nian ba labarik sira atu aprende no sai ema matenek. Aleinde-ne'e, eskola mós asume papél fundamentál ida atu halakon beik no hadi'a ema nia moris iha futuru.”

2. Tanbasá?

Liafuan hahusuk “**tanbasá**” uza atu fó razaun ka justifikasaun ba tema ruma. Bele hamosu parágrafu daruak hosi tema hanesan iha leten.

3. Sé?

Hakerek-na’in sira sei uza liafuan hahusuk “**sé**” hodi define autór ka sujeitu ba atividade ruma. Tuir tema sentrá “edukasaun” iha leten, ita bele uza hahasuk “**sé**” hodi define parágrafu datoluk hanesan tuirmai:

“Pilár importante ba prosesu dezentvolvimentu eskola mak: profesór, estudante, sociedade sivil no governu. Pilár sira-ne’e nu’udar sujeitu ativu ne’ebé serbisu hamutuk ba interesse umanu. Interesse ne’e aas tebes no liga diretu ho ema nia moris ba aban bainrua nian tanba eduka ema sai matenek hodi hatene hili alternativu ba moris di’ak iha futuru.”

4. Iha-ne’ebé?

Pronome hahusuk “**iha-ne’ebé**” uza hodi define fatin ka lokál ba realizasaun atividade ruma. Uza hahusuk “**iha-ne’ebé**” hodi define parágrafu dahaat hosi tema sentrá “edukasaun”.

5. Bainhira?

Pronome interrogativu “bainhira” uza atu define tempu ba realizasaun atividade ka eventu ruma. Ho tema sentrá hanesan iha leten, tuirmai ita uza liafuan hahusuk “**bainhira**” hodi define parágrafu dalimak.

“Iha kalendáriu nasional ne’ebé Ministériu Edukasaun hasai, tinan hanorin hafahe ba periodu tolu. Tinan hanorin ba periodu ida-idak iha fulan tolu, hahú hosi fulan-janeiru to’o fulan-dezemburu.”

6. Oinsa?

Liafuan hahusuk “**oinsa**” uza hodi esplika realizasaun hosi prosesu tomak ida. Husi tema sentrá “eskola” iha leten, realizasaun prosesu ensinu-aprendizajen mak hanesan resposta hosi pilár fundamental sira tomak liuhosi sira-nia devér morál no responsabilidade ba prosesu ne’e. Ho lia-hahusuk “**oinsa**”, define konteúdu parágrafu daneen.

Ezersísiu 4.3.

Utiliza tema sentrál “saúde”, hakerek testu ida tuir sistemátiku hakerek:
Saida? Tanbasá? Sé? Iha-ne’ebé? Bainhira? Oinsá?

D. Aprende gramátika

1) Frazes simples no kadoek

Fraze kontein liafuan ida ka liu, tutan malu ho sekuénsia lójika hale’u hanoin ida. Iha fraze ida nia laran, liafuan ida-idak iha ninia funsaun rasik hodi fó-hatene buat ruma.

a. Frazes simples iha de’it orasaun ida. Nu’udar ezemplu:

- i. Maria estuda siénsia.
- ii. Ami hemu bee.

b. Frazes kadoek iha orasaun liu ida ka rua, hatutan malu uza konjugasaun (no, ka, maibé, se, nst.). Nu’udar ezemplu:

- i. Paul hakarak estuda **maibé** livru laiha.
- ii. João gosta halimar basket **no** haksoit tali.
- iii. Imi gosta han sabraka **ka** haas tasak.
- iv. **Se** imi lakohi bá, fó hatene ami.

2). Funksaun sintátika

Funksaun sintátika iha konstituente fundamentál rua mak hanesan **sujeitu** no **predikadu**.

Sujeitu indika emar ka objektu ne’ebé afirma ka nega buat ruma. **Predikadu** hatudu ida-ne’ebé sofre hosi asaun ne’ebé sujeitu halo. Ezemplu:

Sé mak halimar?

José halimar
↓ ↓
Sujeitu **predikadu**

Verbu báziku “**halimar**” nu’udar **predikadu** ne’ebé indika asaun sujeitu (José) hala’o hela.

Sujeitu iha tipu oioin mak hanesan tuirmai ne’e:

a. Sujeitu kahidak iha elementu sujeitu ida de’it. Nu’udar ezemplu:

- i. **Ana** nu’udar kantora di’ak ida.
- ii. **Imi** gosta Ana.

- b. Sujeitu katetek** iha elementu liu ida. Nu'udar ezemplu, fraze sira tuirmai iha elementu sujeitu rua:
- Paul** no **José** iha eskola.
 - Ana** no **Klara** estuda hamutuk.
- c. Sujeitu la'ek** katak fraze laiha sujeitu, ka sujeitu mak implikadu de'it. Nu'udar ezemplu:
- Gosta lee.
 - Haree ona filme?
- d. Sujeitu la ezistente** mosu kuandu verbu nu'udar impesóal (sujeitu karik la eziste). Bele haree iha verbu sira-ne'ebé hatudu estadu atmosfériku (udan tau, dadeer-saan, rai-nakaras, nst.). Nu'udar ezemplu:
- Horisehik loron manas tebes.
 - Dadeer-saan de'it udan boot ona.

Predikadu kompostu hosi verbu ka elementu sira hola parte iha fraze ida. Predikadu nu'udar kazu ba **Komplementu Diretu, Indiretu no Predikativu ba sujeitu.**

Ezemplu:

Labarik ne'e **tanis.**

Predikadu iha fraze ne'e mak verbu (tanis) ne'e de'it.

Komplementu diretu: hatán ba pergunta SAIDA?

Ezemplu:

Labarik ne'e iha **fisur.**

Labarik ne'e iha SAIDA?

Komplementu indiretu: hatán ba pergunta SAIDA ka SÉ no sempre hahú ho prepozisaun ida. Ezemplu :

Labarik ne'e hatudu livru foun ba **inan.**

Labarik ne'e hatudu livru ba SÉ? _____

Naran predikativu ba sujeitu – kompleta sentidu verbu nian ho karakteriza sujeitu.

Ezemplu:

Labarik ne'e **oin-di'ak.**

Liafuan oin-di'ak karakteriza sujeitu, nu'udar **predikativu sujeitu**

Ezersísiu 4.4.

1. Fó ezemplu tolu ba kada tipu fraze: fraze simples no fraze kadoek!
2. Analiza no identifika tipu sujeitu no predikadu hosi fraze sira tuirmai:
 - Clara hemu bee.
 - João fó saida ba tiu?
 - Ana halimar iha kampu.
 - Ami tuir jogu basketból iha Singapura.
 - Clara no Ana estuda hamutuk.

UNIDADE 5: Lisan Timór nian

A. Abilidade rona no ko'alia

Atividade ne'e hala'o ho apoiu hosi inan-aman ka ema sira-ne'ebé moris uluk. Estudante sei rona istória, lisan ka kultura Timór nian ne'ebé konta hosi inan-aman ka ema sira-ne'ebé moris uluk (avó sira). Estudante sira konta filafali istória ne'e ba inan-aman ka ema seluk.

B. Abilidade hakerek

1. **Testu Konversasionál:** nu'udar dialogál-konversasionál hosi interlocutór rua ko'alia ba malu ka iha interasaun. Nu'udar ezemplu: konversa loroloron, telefóniku, entrevista ka debate.
2. **Testu narrativu:** mak hanesan notísia, kontu, novela, biografía inklui istória imajináriu ka istória ne'ebé loos. Testu narrativu hamosu momentu no asaun tolu: situasaun hahú nian, komplikasaun no rezolusaun:

Situasaun: titulu, hatudu tempu, fatin, no personajen (bainhira, iha-ne'ebé, no sé).

Komplikasaun: hatu'o eventu, asaun, ka problema sira-ne'ebé personajen envolve no enfrenta.

Resolusaun: Hato'o oinsá personajen rezolve problema ka asuntu.

3. Testu Deskritivu

Testu deskritivu deskreve no hatudu : a) ema, aspetu fíziku no psikolójiku; b) espasu fíziku, psikolójiku, sosiál; no c) fenómenu atmosfériku, elementu espesífiku objetu ida nian. Testu deskritivu bele iha modelu oioin : hanesan ensiklopédia ne'ebé deskreve karaterístika (sasán ka animál ruma nian) ka testu sientífiku ruma.

Ezersísiu 5.1.

Fó ezemplu rua ba kada tipu testu tuirmai:

- Testu konversasionál
- Testu narrativu
- Testu deskriptivu

C. Gramátika Numerál sira

1) Númeru kardinál: hatudu hahirak ka kuantidade ba sasán ruma nian. Numerál sira iha lia-tetun tuir sistema nuluk (desimál) katak númeru sanulu mak hun.

Dalan ba hakerek numerál kardinál:

a. Nu'udar liafuan: ida, rua, tolu, haat, lima, neen, hitu, ualu, sia, sanulu, sanulu-resin-ida, sanulu-resin-sia, ruanulu-resin-rua, nst.

b. Nu'udar algarizmu Indu-Árabe:

1. Sifra kahidak: 1, 2, 3, 4, 5, 6, 7, 8, 9:
2. Sifra katetek: 10, 13, 29, 67, 78, 84, 98, 101, 1117, 15 000 nst.

Hakerek numerál kardinál indu-árabe tuir klasifikasaun sekuensiál, hanesan tuirmai:

▪ **Numerál báziku**

1 ida, 2 rua, 3 tolu, 4 haat, 5 lima, 6 neen, 7 hitu, 8 ualu, 9 sia no 0 zero

▪ **Numerál nuluk (dezena)**

10 sanulu, 20 ruanulu, 30 tolunulu, 40 haatnulu, 50 limanulu, 60 neennulu, 70 hitunulu, 80 ualunulu, 90 sianulu.

▪ **Numerál katetek sira ho liafuan-maktulun-resin- iha klase dezena nian**

11 sanulu-resin-ida, 22 ruanulu-resin-rua, 33 tolunulu-resi-tolu, nst.

▪ **Numerál sentena sira ba leten**

100 atus ida, 200 atus rua, 1000 rihun ida, 5000 rihun lima nst.

▪ **Numerál katetek sira ho liafuan-maktulun-resin- iha klase sentena ba leten hanesan tuirmai:**

101 atus ida-resin ida, 106 atus ida-resin-neen, 1111 rihun ida-atus-ida-sanulu-resin-ida, nst.

2) Númeru ordinál: hatudu númeru nia orden ka relasaun ba malu. Iha forma tolu hanesan tuirmai:

a. Nu'udar liafuan testu kahorik

dahuluk, daruak, datoluk, dahaat, dalimak...dasanuluk, dasanuluk-resin-idak, nst,

b. Nu'udar liafuan luzizmu (hosi dalen Portugés)

primeiru, segundu, terseiru, kuartu, kintu, sestu, sétimu, oitavu, nonu, désimu, désimu-primeiro, désimu-segundu, désimu-terseiru, désimu-sétimu, vizézimu, nst.

c. Nu'udar abreviatura ho prefiksu da-

númeru Indu-Árabe: da-1, da-2, da-10, da-11, da-12, da-20, da-100, da-150, da-199, nst.

Ezersísiu 5.2.

1. Hakerek númeru algarizmu tuirmai ba liafuan:

10; 14; 236; 557; 999; 1200; 3456; 7528

2. Hakerek númeru ordinál kahorik tuirmai ba luzizmu:

dahuluk, dalima, dahitu, dasanuluk, dasanuluk-resin-rua

UNIDADE 6: Rain Timór

A. Mai ita hananu

Hanorin inan-aman hananu Inu Nasionál RDTL nian

Pátria

Pátria, Pátria, Timor-Leste, nossa nação.
Glória ao povo e aos heróis da nossa libertação.
Pátria, Pátria, Timor-Leste, nossa nação.
Glória ao povo e aos heróis da nossa libertação.
Vencemos o colonialismo, gritamos:
Abaixo o imperialismo.
Terra livre, povo livre,
Não, não, não à exploração.
Avante unidos firmes e decididos.
Na luta contra o imperialismo
O inimigo dos povos, até à vitória final.
Pelo caminho da revolução.

B. Mai ita lee

Testu: Amu-lulik ida Uluk Tama Iha Rai-Timór

Iha oras ida-ne'e hotu-hotu, ho sira-nia asuwa'in, lulik-na'in, halibur an tomak, ba liurai-feto Lifau*nian. Teki-teki sira haree ró mosu iha tasi, oin hatuduk mai sira. * Liurai-feto haruka ema sira bá hein iha tasi-ibun.

Ró mai besik iha tasi-ibun sadere. * Ema iha rai haree ró nia na'in* hatais hena metan, fitun iha reen-toos, fulan iha hirus-matan, *hasan-rahun klokok. Liurai-feto fó orden ba katuas sira: “ Imi bá husu to'ok* malae kla'uk ne'e, nia buka saida!”.

Ema sira bá husu duni ró-na'in no haruka durubasa hatán ba sira iha rai, “ Ami mai atu haklaken Ami-nia Maromak nia lia-loos ba imi!”.

Sira iha rai fila fali ho lian ne'e. Liurai-feto ho liurai sira haruka bá hatete fali, “ Ó-nia Maromak ami la hatene, ami lakohi!”.

Ró-na'in haruka husu lisensa ba nia ho nia ema sira atu tun ba rai, maibé liurai la fó. Ró-na'in hatete fali “la buat ida!” Maibé, ha'u husu ba liurai sira atu fó lisensa mai ami atu kuru bee iha bee-matan besik tasi-ibun ne'ebá.” Sira hatán katak bele.

Bainhira mariñeiru sira mai kuru bee sira lori ho besi karau-dikur ida*, mai hanuda hela ba bee laran*. Korrente kesi nafatin iha ró.* Ema Timór sira la haree, tanba sira halo festa boot ida. Baba-dook ho dadir lian halo rai nakdoko; babeta ho manu-lian hakatak tebe tan malu*.

Bainhira ema sira iha ró fó sinál ba mariñeiru sira sa'e iha ró katak, ró atu fila ona, sira iha rai haree, tomak bá ró.

Ró-na'in suku-tuur ba rai iha ró ulun, taka liman*, foti matan ba Lalehan iha oras kmanek ida*, no fó orden ba nia ema sira atu hean ró.

Ró foin fila an ema sira iha rai hakfodak boot, tanba rai book an, ró bá dadaun, ankór nia korrente haka'as rai ba tuituir ró. Ema asuwa'in, lulik-na'in, matan-dook, sira tomak halai ba korrente, balun losu surik hodi taa, ba hamulak iha Liurai-feto nia uma. Maibé, korrente la hakotu, ró dada rai ba nafatin*.

Ema ta'uk tebetebes, ne'e duni liurai sira haruka ko'alia fila ho ró-na'in, “ Ah, na'i tasi laran, na'i bee laran, na'i tasi-oan, na'i meti-oan!* Ita-Boot bele hiit-an bá de'it* - husik ami ho ami-nia rain iha nafatin!

Ró-na'in haruka hatán ba rai, “Tanba imi lakohi simu ha'u ho ha'u-nia ema sira iha imi-nia rain, imi lakohi rona ha'u-nia Maromak nia futar lia*. Oras ne'e ami hakarak dada imi-nia rain ho imi bá tan Portugal!”

Nune'e, sira tomak hatete, “Ita-Boot bele tun, naran ami labele bá, tan* ne'e Ita-Boot nia rain!” Bainhira ró tun*, rai mós hakmatek.

Amu-bispu foin iha rai, liurai boot ho liurai lulik sira suku-tuur hodi kumprimenta. Ita-Boot liu, kala liurai-feto – la hatene loos foin atu hakat besik liu atu re'i, ró-na'in foti liman, hakahik nia: “Keta hakbesik ha'u, tanba ha'u ema lulik!”

Nune'e sira tomak hatete, “Ita-Boot amu-lulik liu ami-nia liurai lulik sira!”

Liurai sira hotu-hotu simu did'ak Amu-bispu ho nia ema sira, fó nafatin uma ba sira*. Amu-Lulik haklaken daudaun Na'i Maromak nia futar lian ba Liurai-feto Lifau. Na'in ho nia reinu barak sarani duni.

Testu Geoffrey Hull, 1993 (Adaptadu)

Ezersísiu 6.1.

Hatán ba hahusuk sira tuirmai bazeia ba testu iha leten!

1. Testu ne'e iha parágrafu hira?
2. Antónimu hosi liafuan "lia-loos" iha parágrafu daruak, liña segundu, mak saida?
3. Sé mak haruka husu lisensa ba rai-na'in sira atu kuru bee?
4. Sé mak hakfodak bainhira ró book an atu fila?
5. Se-sé de'it mak bá tesi korrente ró nian
6. Sé mak haklaken dahuluk Maromak nia futar lian ba Liurai-Feto Lifau no nia povu?

E. Gramátika (*adverbiál sira*)

Adverbiál nu'udar advérbiu simples ka liafuan ida de'it, hanesan tuirmai ne'e :

- Fatin : iha-ne'ebé loos
- Tempu: Bainhira loos
- Nu'u ka maneira : Oinsá loos
- Sasukat ka medida : hira loos
- Afirmaun no negasaun : Loos ka laloos
- Laran-rua ka dúvida : loos ka lae
- Buka-hatene ka interrogasaun : nune'e ka?
- Maka'as hira ka intenside : tebetebes ka ladún.

1. Adverbiál fatin utiliza liafuan sira hanesan: **iha-ne'ebé, iha-ne'e, hosi ne'e, hosi uma, mai uma**, nst. Ezemplu:
 - ami hemu hela **iha-ne'e**.
 - sira la liu **hosi uma**.
 - ami fila **hosi ne'e**.
2. Adverbiál tempu utiliza liafuan sira hanesan: **bainhira, kuandu, horikba, hira, daudaun, semana uluk, tuku hitu**) nst. Ezemplu:
 - **bainhira** mak sira bá tasi.
 - **semana uluk** sira bá pasiar iha tasi.
3. Adverbiál nu'un ka modun uza liafuan: **naran, oinsá, halo nu'usa, naranaran, maka'as, saugati, kasian, mukit**, nst. Ezemplu:
 - Imi ko'alia **naranaran** de'it.
 - Imi tenke ajuda ema **mukit** sira.

4. Adverbiál konfigurasoun: **ida-ida, lemo-lemo, laran-bali'ur, mesak**, nst. Ezemplu:
- Imi **ida-ida** sei lori kadernu ho lapis.
 - Nia la'o **lemo-lemo** rai.
5. Adverbiál sasukat: **mós, hotu, liután, barak, basuk, baibain, kurakuran, kuaze**, nst. Ezemplu:
- Sira **mós** hasoru ha'u iha dadeer-saan ne'e.
 - Ema hotu hakarak Ita-Boot atu sai diretór ba diresaun ne'e.
6. Adverbiál afirmasaun no definisaun: **sin, loos, nune'e, afinál, liuliu, satán**, nst. Ezemplu:
- **Loos-duni**, sira-ne'e estudante klase 7.
 - Sin, livru ida-ne'e mak **loos**.
7. Adverbiál negasaun no limitasaun: **lae, la'ós, nein, ladún, nunka, só, mesak, nein**, nst. Ezemplu:
- Ita-Boot maka bolu ha'u ka? **Lae**, La'ós ha'u.
 - Nia **ladún** hatene kona-ba asunto ida-ne'e.
8. Adverbiál dúvida ka laran-rua: **karik, kala, se, bele, to'ok, maizumenus, selae, parese, dalaruma, podia**, nst. Ezemplu:
- **Karik** aban ha'u bá vizita ha'u-nia inan.
 - Ha'u-nia kolega sira **dalaruma** halimar iha eskola laran.
9. Adverbiál interrogasaun: **oinsá, bainhira, ka, lae, tansá, dalahira**, nst. Ezemplu:
- **Bainhira** mak ita bá almosu hamutuk?
 - **Tansá** imi dehan ida-ne'e mai ha'u?
10. Adverbiál intensidade: **loos, tebes, tebetebes, duni, kedas, lahalimar, mezmú, para, natoon, komplementu, totalmente, para, liu**, nst. Ezemplu:
- Se Ita-Boot hakarak **duni**, aban bele mai foti.
 - **Loos**, ha'u mak dehan ida-ne'e ba nia.

Ezersísiu 6.2.

1. Forma fraze ho liafuan adverbiál sira hanesan tuirmai!

hosi uma	bainhira	maka'as	kasian
mesak	ladún	só	maizumenus
dalaruma	tansá	oinsá	dala hira

2. Forma fraze ho adverbiál sasukat, afirmasaun, negasaun no dúvida!

Referénsia

Santos, M. M. et al. (2016). *Tetun, Tinan Da-8 Ba Siklu Da-3 Ensinu Báziku*. Portugal: Porto Editora.

PERGUNTA SIRA BA DIXIPLINA TETUN: TINAN DA-7 período 2

Hili resposta ida-ne'ebé loos hodi marka (X) ba a, b, c ka d:

1. Espresaun “estudante sira mesak *ulun mamar*”, nia sentidu saida?

- | | |
|---------------|---------------|
| a) baruk-teen | b) na'ok-teen |
| c) badinas | d) matenek |

2. Bainhira hakerek kompozisaun ruma, liafuan hahusuk ne'ebé uza atu fó justifikasaun ba tema ruma mak...

- | | |
|----------------|-------------|
| a) Iha-ne'ebé? | b) tanbasá? |
| c) sé? | d) saida? |

3. Bainhira hakerek kompozisaun ruma, liafuan hahusuk “sé” uza atu define....

- | | |
|------------------|-----------|
| a) fatin | b) tempu |
| c) autór/sujeitu | d) razaun |

4. “Maria no João bá loja”. Tipu sujeitu hosi fraze ne'e mak...

- | | |
|--------------------|-------------------------|
| a) sujeitu kahidak | b) sujeitu katetek |
| c) sujeitu la'ek | d) sujeitu la ezistente |

5. Testu “biografía” klasifika hanesan testu...

- | | |
|-------------------|----------------------------------|
| a) narrativu | b) deskritivu |
| c) konversasionál | d) resposta a, b, no c loos hotu |

6. Númeru kardinál algarizmu indu-árabe mak...

- | | |
|--------------------------------|-----------------------------|
| a) ida, rua, tolu | b) dahuluk, daruak, datoluk |
| c) primeiru, segundu, terseiru | d) 1, 2, 3, 20, 45 |

7. Adverbiál tempu uza liafuan sira hanesan:

- | | |
|------------------------------|-------------------------|
| a) oinsá, iha-ne'ebé, kuaze | b) sin, kuaze, mesak |
| c) bainhira, kuandu, daudaun | d) karik, oinsá, kuandu |

8) Liafuan “oinsá, bainhira no tansá” klasifika ba adverbiál:

- | | |
|----------------|------------------|
| a) intensidade | b) interrogasaun |
| c) negasaun | d) afirmasaun |

9. Adverbiál negasaun mak...

- | | |
|----------------------|------------------------|
| a) lae, ladún, nunka | b) barak, nunka, mesak |
| c) parase, lae, duni | d) ladún, loos, barak |

10. Frazee ida-ne'ebé mak ezemplu hosi adverbiál sasukat?

- a) Ha'u ladún hatene kona-ba asunto ne'e.
- b) Semana kotuk ami ba vizita família.
- c) Estudante barak mak tuir ezame nasional.
- d) Sira mai hosi ne'ebé?